

**Mesyuarat Umno Kota Tinggi kecoh**  
**Malaysiakini.com**  
**Oct 27, 2008**

Persidangan perwakilan Umno Bahagian Kota Tinggi hari ini tegang seketika apabila beberapa ahli mendesak mesyuarat ditangguhkan kerana tidak bersetuju dengan pemilihan Timbalan Pengerusi Tetap Sarwani Sain mempengerusikan persidangan.

Pertelingkahan timbul apabila beberapa perwakilan termasuk Naib Ketua bahagian Mohd Zain Ariff mahu Pengerusi Tetap, Mohamadon Abu Bakar yang didapati bersalah oleh Lembaga Disiplin Umno baru-baru ini, dibenarkan mempengerusikan persidangan itu.

Setiausaha Umno Bahagian Rosleli Jahari, bagaimanapun, menjelaskan surat yang diterimanya dari Setiausaha Kerja Umno Brig Jen (B) Datuk Husainay Hashim pada 23 Oktober lalu, menjelaskan kedudukan Mohamadon dan bekas naib ketua Pemuda Umno bahagian A. Malik Daeng Rahman, sebagai tidak layak untuk menghadiri persidangan hari ini.

Menurut laporan Bernama, penjelasan Rosleli dan surat itu yang diedarkan kepada para perwakilan gagal meredakan pertelingkahan antara kedua-dua pihak, sehingga menyebabkan campurtangan Ketua Umno Bahagian Datuk Seri Syed Hamid Albar.

syed hamid albar 02Syed Hamid berkata semua pihak hendaklah menghormati keputusan Lembaga Disiplin Umno dan menggunakan saluran serta kaedah sedia ada untuk menyuarakan bantahan.

"Jikalau setiap daripada kita mula menjadi peguam dan mentafsirkan peraturan dan undang-undang secara sendiri, kita tidak akan ke mana-mana. Hormatilah keputusan Lembaga Disiplin. Jikalau tidak bersetuju, bawalah ke Ibu Pejabat Umno," katanya.

### **Mesyuarat diteruskan**

Syed Hamid berkata persidangan perwakilan tidak boleh ditangguhkan kecuali wujud suasana huru-hara dan tidak tenteram.

Selepas hampir satu jam bertelingkah mengenai kedudukan Mohamadon, Mohd Zain dan perwakilan lain akhirnya bersetuju membenarkan Sarwani meneruskan persidangan.

Syed Hamid berkata persidangan itu akhirnya berlangsung dalam suasana tenang.

Mengenai pencalonannya bagi jawatan naib presiden yang melepasi kuota kelayakan semalam, Menteri Dalam Negeri itu berkata beliau bersyukur dengan kepercayaan yang diberikan dan akan terus bekerja keras.

Mengenai dua lagi pemimpin Umno Johor iaitu Menteri Pelajaran Datuk Seri Hishammuddin Tun Hussein dan Menteri Pengajian Tinggi Datuk Seri Mohamed Khaled Nordin, yang turut melepasi kuota pencalonan jawatan Naib Presiden, Syed Hamid berkata pencalonannya tidak patut dilihat daripada aspek kenegerian.

Copyright © 1999-2007 Mkini Dotcom Sdn. Bhd.  
Source : <http://www.malaysiakini.com/news/91967>